

55 aniversario Oficina di Asunto Interno

ORANJESTAD Dia 7 di oktober 1953 a funda oficialmente e oficina di Registro y Expedicion pa teritorio insular di Aruba. E oficina ta encarga pa registra tur documento cu drenta na oficina di Gobierno y tambe percura pa manda e cartanan di Gobierno pa e respectivo destinacionnan tanto interno como externo. Interno ta nifica entre e propio departamentonan y externo ta referi na personanan individual of instancianan sea local of internacional pafo di Gobierno. E prome hefe di servicio di Agenda, manera e tabata conoci e tempo ey, tabata un dama esta Olga Henriquez di 1953 pa 1956. Despues a sigui Nicasio Figaroa te cu 1985 y e nomber di e oficina a cambia pa Registratuur & Archief. Cu realisacion di Status Aparte na 1986 e nomber a bira Bureau Interne Diensten y e hefe for di 1986 te cu 1990 tabata Inocencio Martis. Di 1990 pa 1995 señora Trudy Hassell a ocupa e puesto di hefe di BID. E hefe actual Juan Brete a keda nombra na 1995.

E oficina tabata situa na Bestuurskantor te cu november 2007 ora cu mester a muda debi na e mal estado di e edificio na Bestuurskantor. Den cuadro di realisacion di Status Aparte na 1986 y pa determina e tareanan di e oficina, a dicidi pa institui Servicio pa Asunto Interno (Bureau Interne Diensten). E departamento a expande su servicionan debi na e aumento di departamentonan gubernamental y a haya mas tarea pa cumpli cu e servicio interno. E trabounan interno actualmente no ta concentra solamente ariba e servicio di entrega y busca carta conoci como expedicion, pero tambe tin e servicio di reproduccion (saca copia), maneho digitalisa di registro di documentonan, servicio central di compras di articulonan pa oficina y e servicio di entrega carta y documentonan na e oficinanan di ministronan y gabinete di gobernador, cursonan tocante registro y archivo pa personal di Gobierno. Pa loke ta e trabounan externo BID ta fungi hopi biaha como un servicio di post pa entrega cartanan special na ciudadanonan. Y tambe e ciudadano por haci uzo di e servicio di BID pa entrega un carta na un mandatario. Na momento di entrega e carta, e ciudadano ta haya un prueba cu e carta a keda registra cu un number. Esaki ta hopi importante

pa e ciudadano pa despues e por sigui puntra unda cu carta a keda, specialmente si e ta desea di haya un contesta di Gobierno riba su peticion. Anteriormente na BID tabata situa tambe e telefon central di Gobierno, e conocido 4900. Aki un hende ta yama puntra pa un departamento, oficina di diputado/ministro cu ta situa den Bestuurskantor. Pero cu tempo e oficinanan a bin ta dispone di nan propio number di telefon anto publico no ta uza 4900 mas.

BID ta maneha e archivo dinamico y semi-statico di Gobierno. Dinamico kiermen tur documento cu ta actualmente den uzo. Semi-statico ta e documentonan cu no ta den uzo mas, pero ta keda pendiente pa un periodo si acaso un persona por puntra pa

e documento. Despues di tempo, depende si e documento tin un balor historico anto ta pasa esaki pa Archivo Nacional di Aruba (ANA). Aki tur hende por wak e documento cu por ta un rapport, un relato anual, relato di reunion etc.

Henter e proceso di maneha e archivo dinamico y semi-statico ta basa ariba proceduranan prescribi conforme reglanan internacional di maneho y conservacion di archivo y documento. BID ta encarga tambe cu e maneho di registro di documentonan den e sistema digital. Pa esaki BID ta asisti tur departamento gubernamental pa nan por uza e mesun sistema di registro. Esaki ta facilita e proceso di circulacion di documento entre e departamentonan, esta cu por

follow up unda un carta ta. E proyecto di automatisacion a cuminsa na 1992 bou guia di e hefe di e tempo ey señora Trudy Hassell. Otro servicio importante di BID pa e aparato gubernamental ta esun di reproduccion hacienda uzo di machinnan grandi. Por saca copia di documentonan manera rapport, buki etc y encuaderna pa un uzo optimal. E servicio aki ta disponibel tambe pa scolnan y fundacionnan semi-gubernamental. BID ta encarga tambe cu e Centraal Magazijn y aki tur departamento di gobierno por cumpra material pa oficina manera papel, material pa computer, envelop, bandera etc. Recientemente a agrega tambe material di limpieza na e lista di productonan. E Magazijn aki ta uno central y ta

ofrece e productonan na un prijs razonabel pa e departamentonan di gobierno. BID tin e servicio central di bode cu ta encarga cu e servicio di hiba y busca carta pa departamentonan gubernamental y tambe pa oficina di e ministronan. Tambe ta hiba carta di Gobierno pa oficina di Gobernador, Parlamento y instancianan particular.

Durante 55 aña BID a crece no solamente den su tareanan, pero tambe a experiencia e cambionan di trabou manual pa trabou automatiza haciendo uzo di tecnologianan moderno. Actualmente BID ta situa den Middenweg 20 na Oranjestad, pariba di Bon Bini Bazar. E number di telefon ta 583-4114, fax 583-3752, e mail bid@aruba.gov.aw.